

Nies vitg e ses funcziunaris d'avon onns

Ii vitg da Rueras ei da vegl enneu staus in vitg de purs. Staus! Ussa denton ves' el buca ora pli aschi purils. Buca da gliez fatg lessel scriver. Miu intent ei da scriver e tener en memoria co nies vitg vegneva regius e tgi e co il fatg public vegneva tenius en uorden. Ei fuva necessari che las fatschentas currentas vognien liquidadas en uorden per saver viver e vischinar endretg denter vischins.

Cauvitg

Il cauvitg dat ei probabel aunc oz en mintga vitg muntagnard Sursilvan. En certi liugs vegn el numnaus il "cuitg", en auters "cauvitg" ed en Tujetsch il "tgauvitg". Il num dat d'entelir tgei funcziun e tgei stan el ha. Il uffeci vegneva partius entras elecziun, en auters vegneva ei tratg la sort entochen che tuts eran stai vidlunder. En nies vitg vevan nus denton ina tuttavia singulara moda d'eleger. Tenor sco ins era maridai vegneva ins en rodan. Aschia saveva ei capitlar ch'in bab vegneva per en roda cura ch'el haveva gia affons che vessan saviu vegin pladi pasturs da casa. Quei denton vesevan ils vischins insumma buca bugen. Il pli grond avantatg da quest sistem havevan nos mats vegls. Els vegnevan mai en roda da surprender quei uffeci. E da lauter maun deva ei a beinenqual pign e pauper vischin la pusseivladat da seprofilar sco suprastont. Propri vera democrazia. -?- Per honur da bein enqual astgan ins dir che quels che vevan schiglioc mai da dir in plaid e mo tedlar e quescher ein magari gnanc stai ils pli tups.

La funcziun dil tgauvitg fuva da pladir tuts survients ch'il vitg duvrava in onn ora: Paster da casa, paster da genetschas, nurser da primavera, cavrer, vischander, purtger, reteneder e pender. Dasperas haveva el aunc da mirar per las fatschentas che pertuccavan il beinstar ed uorden public el vitg, lu la cumpetenza da representar ils vischins tier la vischnaunca.

Ina obligaziun dil tgauvitg da Rueras era da haver quittau che las geinas egl ingress dil vitg vognien montadas la primavera e gl'atun demontadas.

Rueras possedeva lu quater geinas. Igl ingress denter quellas geinas era pastira communabla ed ils tiers astgavan pascular quella. Ina geina steva denter la remisa dils Lucas Cavegns ed il baghetg dils Venzins. Obligaziun da mirar da quella e da montar ella, era dada alla famiglia da Gion Antoni Berther-Cavegn e pli tard a siu fegl Giachen Fidel Berther-Loretz. In'autra steva denter las casas da Duri Vigeli Cavegn. La geina oragiudem, numnada la geina dil clavau dil "Meltger" mirava la famiglia da Placi Monn-Venzin, quei era quella che serava la via dellas Pallius che menava giu Milar. Avon ils Placi Monns sudeva l'obligaziun al Duri Riedi che habilava lu en quella casa. Enagiudem il vitg era la via da Plazs, la via principala che menava giu Milar, cheu er la quarta geina, la famiglia dils Alexis Hetz haveva da mirar da quella, pli tard lur vegnentsuenter. Lu ca. 1910 han ils vischin, cun consentiment da Chrest Giachen Giossi e Duri Vigeli Cavegn, montau ina geina dador baselgia. Quella surveva per mantener schuber avon baselgia per che las cauras e pors mondien la damaun buca da leu en, mobein da via giu e sut baselgia enasi.

Era la geina della punt dil Rein era obligaziun dil tgauvitg da controllar ch'ella segi en siu liug. Sustenius tier quellas controllas vegneva il tgauvitg dal pinder.

Il temps entuorn sogn Martin veva el da rapportar tgei ei fuva curriu e passau in onn ora el vischinadi. Dapli clamar en da tagliar pustretsch per mintga sort da pasters e pasturs. Far il quen e dar ora las giestas da pustretsch. Pli baul stueva el scriver perfin sez il protocol. Alla fin haveva el lu da surdar il cudisch a siu successur. Pustretsch vegneva ei pli baul adina tagliau e liquidau en la stiva dil tgauvitg.

Per la vischnaunca veva quei um beinduras da far publicaziuns, visar lavur cumina ed auter. Pli da vegl vegneva quei tut fatg senza pagaments e pagaglia, tut suenter la devisa; oz a mi e damaun a ti. Ozildi ei quei tut rugalau e reglementau.

Il cudisch da vischins da nies vitg entscheiva cun igl onn 1845 e menaus da nos basats, tats e babs entochen igl onn 1975, pia 130 onns. Tgei po ei bein esser schabegiau tut en quells biars onns. Lein esser

engraziaivels a tut quels ch'ein seschais en per il beinstar dil generaless.

Il niev cudisch vegn continuaus cun 1976. Oz vegn igl uffeci da tgauvitg fatgs tenor elecziuns. Cunquei che mo paucs vischins fan pli il pur, dat ei sper il tgauvitg aunc in tgauvitg da purs, il pladider. Quei ei daventau ord il motiv che quel ha buca tiers stoppi buca pladir cavrer e nurser ni sempitschar da caussas che pertuccan mo il puresser. Il pensum dil tgauvitg ni tgauvitga (!) (art. 5 dil regulativ per il vischinadi da Rueras) secloma: El ei la persuna principalpolitica dil vischinadi, ha da mantener contact culs vischins e representar ils interess generals dil vischinadi avon tuttas instanzas e leschas subordinadas. Preparar, publicar e menar tuttas radunonzas da vischins. Meina ed archivescha tutta correspondenza ed empala ils giavischs dils vischins allas instanzas cumpetentas. Plinavon ha el da star a disposiziun all'urna tier tuttas votaziuns.

Il cavrer

Per nies vitg ei il cavrer staus da vegl enneu ina persuna importonta. Haver il cletg da pladir in bien e fidau cavrer gliez..... gliez haveva num vus. Sch'ins patratga che buobs denter 12 e 15 onns savevan supreender quei survetsch e tgei persum che spitgava sin els san ins mo sesmarvegliar. Tgei viadis e turas che quels havevan mintgadi da prestar. Strusch pli da semaginar ozildi.

Nus vegls seregurdein aunc oz che mintga casada haveva cauras, era quei gie era la vacca dil pauper. Mintga matta veglia, mintga vegliet, mintga mat persul haveva enzaconts da quels animals. Purs cun duas, treis e quater vaccas havevan il bia da quei da 15 e varga cauras. Aschia possedevan ils da Rueras da quei da prest 500, Sedrun schizun varga 600 e mintga vischinadi pli pign haveva siu diember cauras.

Sch'il cavrer era in dil vitg durmeva el a casa. Er'ei pladiu in da ordlunder haveva el dimora tier il tgauvitg. La damaun er'ei da levar bien a baul ed ira a spisa en roda. Haver treis cauras vuleva dir dar in di spisa al cavrer. Suenter solver prendeva el sia marendas en sia tastga da curom e mava

a curnar. Armaus era el il bia cun in fest ed ina gheisla. Curnau vegneva ei cun in tgiern buc. La ruta da curnar entschaveva odem il vitg. Suenter il cavrer vegnevan las cauras catschadas da dretg e da seniester ord nuegl e suenter il pastur. Entadem il vitg, dadens baselgia, en ina giassa stretga vegnevan las cauras retenidas. Fuva ei evident che tuttas eran cheu untgeva il cavrer ensi ni engiu. Aschia mav'ei direcziun Plaun Miez il temps da malaura ni si encunter la val Milà, alp Culmatsch ni Caschlè cura ch'ei era bi. Pertgei cura ch'ei era cargau havevan ei buca tec bugen sch'il cavrer mava engiu dis da bial'aura. La suleta excepziun astgava el far sin la fiasta dal sogn Cor da Maria. Lu astgava era il cavrer esser denter ils carstgauns.

D'ira ensi astgava el retener las cauras en stavel Milez per presapauc in quart ura. Denton stueva el mirar bein che sias cauras paschentien buca il pastg da biestga. Suenter il paus catschava el las cauras en il liug da pascular e arrivaus inagada cheu haveva el las cauras en in liug da pacular e arrivaus inagada cheu haveva el il bien dil mund. Mo buca adina, fageva l'aura il barlot era ei era per el beinduras dir e prigulus. - Vida suenter miezdi entschaveva el a rimnar sia muntanera e vegneva tochen giu entcunter la pastira da casa. Cheu astgavan ellas aunc inagada pascular avon ch'ira a casa. A casa mava il cavrer a spisa e lu era el matei salvs per curdar da letg en.

Aunc oz vesan ins cheu e leu trutgs che dattan perdetga da grondas muntaneras e da liungs et prigulus viadis ch'il cavrer stueva far per arrivar el liug destinau da pascular. Il cavrer da Rueras mava savens tochen si Culmatsch e dal maun da Val Giuv viaden e la sera gl'entir viadi puspei anavos. Cura ch'el mava engiu mavan las cauras sur Nual siadora. Mo era en auters vischinadis eran ils viadis liungs e stentus. Il daSurrein mava enasi Pardatsch, traverseva enasi il Cuolm Nalps ed els Cotschens. Ils da Sedrun entadem Val Strem ed ils da Cavorgia en Val Gierm sur il Vanatsch ed era tochen els Cotschens. Cura che jeu erel staus cavrer giu Surrein haveva miu vischander giu visau mei en in liug nua ch'il trutg menava tras ina preit crap. "Sche te as tema, fo ina sontga crusch".

Gie, la sontga crusch ed in bien aunghel pergorader ha segir gidau beinenqualgada ils cavrers d'avon onns. Sch'ins patratga tgei immensa prestaziun quels buobs stuevan prestar ed en tgei prighels da crappa e malsegir ei savevan vegnir. Cons babs e mummas han giu grevs muments da quitaus e panzieris per lur affons che stuevan far en tut aura lur duer. Biaga per ina pintga, pintga pagaglietta. Aschia dat ei beinenqual datum da disgrazias da cavrers e pasturs en la historia da Tujetsch.

Enta Rueras haveva il cavrer dus gidonters: In era il vischander e lauter il reteneder.

Il vischander

Il pastur vegn ad esser il pli vegl denter ils funcziunaris e cun el era il vischander. Veggan quels dus gie numnei gia en la bibla (Gn 10, 12). Denton leu fa il vischander buca bien gatti a siu num, sco la bibla di defende il pastur sia muntanera daferton ch'il vischander ei fugius. - Il vischander era quel che haveva da mussar al cavrer sia lavur. Era sche quel en la bibla vegn scurvanaus bein aschia, ils biars da quels che jeu hiel enconuschiu ein stai glieud endretg, han fatg lur duer cun talent e lur bregia. Ei ha lu dau da quels vischanders ch'ein sevanzei entochen pastur ed era il cuntrari. -

Igl auter sundel staus inagada a cumin e quasi e miez il cumin in che vuleva ira a Cuera sco deputau. In giuvenot ei lu sepresentaus sin la venerabla buora e fatg da saver ch'el vegnessi bugen mo vischander. Veramein!!

Il reteneder

Cunzun l'entschatta della stad haveva il cavrer beinduras ina stroda veta da rimnar vid suenter miezdi sias cauras. Aschia dev'ei che las empremas semetevan gia sin viadi daferton che autras eran aunc sissum la pezza. Il reteneder da Rueras era gest engaschaus per gidar il cavrer ord quella miseria. El haveva da sepostar entuorn las quater suenter miezdi entadem stavel Milez sin il Crap della Valatscha. Quei ei

in terment crap, bunamein aschi gronds sco ina casa. Cheu haveva el da retener tuttas cauras entochen ch'il cavrer era suenter cun las pli davosas. . Ed en quei grau era il cavrer buca maneivels. Schar scappar cauras avon uras dad ira a casa, gliez fuva quasi ina zanur. Ei sedi buca per nuot che mintga mistregn hagi ses principis e siu bien num. Sch'ei deva in detg urezzi ni malauras astgava il reteneder ira tochen ora egl uaul da Malamusa. Cheu sut ils bracs e vegls pegns en vegnev'ei reteniu entochen ch'ei era uras d'ira a casa. La pagaglia dil reteneder era plitost pintga, tschun francs e pli tard diesch. Plinavon stueva il cavrer parter cun el sia marendia.

Tier nus ein quei uffeci svanius. Cavrer ha ei aunc, mo ils fastedis da saver pladir in ei per quei sulet pur da cauras enta Rueras ualts gronds. Aschia ei il reteneder svanius, il vischander drov'ei strusch ed il cavrer..... con ditg va ei aunc ed el ei era buca pli. Cheu fuss in reteneder puspei buns, per buca schar ira tut a piarder.

Il purtger

Tujetsch haveva pli baul ina tut atgna razza da pors. La tratga da quels era beinduras ina domena dellas puras. Ei deva da quellas che havevan in tut appartii bien maun per trer si in letg purschals. Aschi haveva Tujetsch era ina partida marcadonts da purschals. Sur il cuolm d'Ursera, sur il Ritzli e Mittelplatte tochen giu a Sviz e perfin dal Tessin giuadora transportavan quels lur tiers per marcadar. Temps d'univiern purtavan ei ils purschals si dies en in sac sur il pass vi. Beinduras ei quei stau in mistregn riscau e fadigius. Denton dev'ei zitgei da fadigiar als purtaders sco als marcadonts. Cu ei pagava bein fagevan ils martcadonts il gianter e mav'ei inagada mender fagevan ei sco ei gnanc savessan exister. Ins astga denton segir pretender ch'ei era in mistregn riscau e fadigius.

Jeu sei buca seregurdar d'autras vischnauncas che possedevan in paster da pors in purtger. Denton en nossa vischnaunca ei quei stau il cass e quei segir en treis vitgs: Rueras, Camischolas e Sedrun. Buca mo il posseder buna carn, sco carn pierig, andutgel e schambuns, era il saver marcadar, sco gia menziunau, era tschercaus. Per tonta muaglia da pors duvrava ei era in pastur che mirava per uorden. Tgi fageva quei

uffezi? Per ordinari buobs dils emprems onns da scola. La paga era il bia denter 20 e 40 francs. Pli tard ca. 2 francs 50 per tier e dapli. Famiglias cun biars affons eran engrazieivlas per mintga rap gudignau ed aschia eran ils affons era occupai. Igl urari dil purtger da Rueras era aschi che cura che las cauras eran navenda haveva el d'entscheiver siu tur odem il vitg. Eran tuts pors rimnai enta Suloms vegnevan ei catschai dals Trutgs giu e vi da lautra vart dil Rain. Aunc oz senumna ei leu "Plaun da pors". Cheu pudevan ils pors sfugar e far bogn tenor gust e plascher. La sera vegnevan ei lu puspei catschai si el vitg e da nuegl en. In um vegl ha dumandau inagada in purtger, co ei mondi da far quei uffeci? "Nuota schimal". "E cu eis ei il pli bi?" "Il pli bi eis ei cu las piergas dorman". -

In sa comprender tgei schubradat ei regeva cu tuttas muntaneras da cauras, pors ed auters tiers da casa vegnevan catschai di per di stras nos vitgs. E tgei odur? Tonaton dian ei che l'aria d'oz il di segi mendra. Il niev temps ha purtau bia bi mo era enqual malengasi. Segir eis ei ch'ei regia dapli schubradat e higiena.

Il nurser della primavera

Strusch fuvan igl avrel las spundas e plauncas terrenadas, vegnevan las nuorsas catschadas ord nuegl e per ils terreins entuorn. Nos vegls pretendevan: "Cu las nuorsas pon tier tratsch la primavera ein ellas a metsch." Beinduras vevan quels paupers animals veramein basegns dil tratsch. Fuva quei era savens la davosa scompa.

En Tujetsch vegneva ei fatg plitost sil tard mundi cun las nuorsas. Pervia da quei dev'ei lu detgas rambotschas sin vischnaunca e denter vischins. La squadra denter l'aua della val Strem e Carmischeras haveva da far mundi treis dis avon che quels da Rueras. Suenter quels treis dis havevan ils da Camischolas dafar quei ch'era dadora il Dutg grond ed ils da Rueras quei dadens. Puspei treis dis suenter ils da Selva e medemamein il vischinadi da Caviggia che mettevan las nuorsas a Plaunmiez cun las da Rueras. Ils da Tschamut han giu ditg il dretg da catschar lur nuorsas dadens l'aua da Val-Val e tener ellas si encunter il Calmut. Forsa ei quei dretg seresultaus aunc dal temps che l'alp

Tschamut sudeva mo a quei vischinadi. Per suenter ils onns 50/60 han ils da Tschamut cargau lur nuorsas cun quella da Selva.

Denter ils da Camischolas/Zarcuns ed ils da Rueras dev'ei meinsavart schischuris pertuccont il far mundi cun las nuorsas. Mo per ordinari fuva ei lu fatg cun empau reproschas a zacu secunvegnevan ins.

Il tgauvitg da Rueras era obligaus da pladir il nurser naven da far mundi tochen cargar ad alp. La paga, tenor in protocol da 1905, era lu 18 raps la nuorsa, 1956 gia 80 raps e navenda 1970 ensi haveva il nurser da Rueras denter 1800 francs tochen varga 2000. La pasculaziun dellas nuorsas haveva da succeder in di a miez el maises da Milar, in di e miez el maises da Malamusa e lu far la midada giu Plaunmiez. Fuva la muntanera inagada cheu muncava ei per ordinari il pavel a quella. Aschia haveva il nurser dus quittaus. Gl'emprem era da buca schar vegnir las nuorsas sur ils numerus vadretgs vi el prau ed il secund era da tener ord il pastg dils tiers da casa. In um vegl haveva detg inagada: "Las nuorsas munglas ins far star el aria, mo umbriva astgan ellas lu era buca far".

Fuva ei lu inagada terrein, lu pasculavanellas tut il Tgom e Stavels secs, l'Alpetta da Nalps, tut Nual e Mut tochen enagiu en stavel da Curnera (ussa lag). Daventava gliez vegnevan lu ils Mugglis cun las visadas. Nuorsas ein animals senza tiarms e tener quellas vul capientscha. Ils biars nursers dils davos onns pertgiravan elllas il bia navenda il "Landstross" cun il perspectiv. Entuorn sogn Gion vegnevan las nuorsas stavladadas e catschadas giu Plaun da Pors dadens la punt sin l'insla pintga. Cheu vegnevan elllas zavradas e cheu han ins era entschiet a lavar ni silmeins bugnar elllas encunter la rugna. Pli tard han ins fatg il claus vi Suloms, per zavrar elllas ed ils davos onns van ins cun elllas directamein a Valtgeva. Cheu han ins fatg in cundrez special per far bogn cun las nuorsas.

1991 han ins giu pladiu il davos nurser da Rueras. La pasculaziun cumina ei vegnida dimessa entras votaziun. Ils purs han entschiet a clauder en las nuorsas sin il prau entochen cargar e sefutran da comunicar e pagar pasturs. Denter ils purs da nuorsas han ei votau giu

tgi che segi per pladir pastur e tgi buca. Schotg ein stai encunter e mo tschun persuenter. Forsa vegnan ins puspei anavos sil sistem vegl, mo jeu creiel ual vess.

Il paster da tgesa

Era quel haveva nies tgauvitg da pladir. Ei duvrava pli u meins buobs ferms cun empau giudezi e senn da responsabladat. Per tutz quels survetschs han in adina giu suficientamein interessents. En in protocol da vischins digl onn 1892 secloma ei: "..... il cauvitg ha nuncondiziunadamein il dretg e l'obligaziun da pladir pasturs suenter siu meglier saver, per bien dils vischins. Duessan aber plirs ord il miez dils vischins schar decider quels."

Pasters da "tgesa" duvrav'ei dus. In per las vaccas ed in per las genetschas. Las genetschas restavan duront il far fein a Plaunmieze e stuevan da miezdi, sch'ei fuva da rischlar, vegnir catschadas a casa per duvrar da trer. Avon ils onns 1910 teneva quasi negins vischins genetschas a casa. Ins purtava pli u meins il bia il fein cun blahs si dies en clavau. Aunc jeu mez hai fatg quella moda ina stad, mo lu hai era anflau ch'ins fa pli tgunsch autruisa. Ils onns dallas maschinas agricolias han buca mo schanegiau il dies dils purs e las totonas dellas genetschas, na els han era fatg fin cun il paster da genetschas.

Lein turnar anavon tier la pasculaziun da genetschas e vaccas. Fuva il fein grass en, vegnevan las genetschas catschadas en la val Milar, sin pastira da tgesa. Las vaccas stuevan naturalmein mintga sera vegnir catschadas a casa pervia dal mulscher. Igl emprem paster da casa numnaus ei stau igl onn 1913 Fidel e Stiafen Hitz per ina paga da 130 francs, 1961 ein Vigeli Giusep e Tumaisch Berther per 700 francs. Ils davos pasters ni pasturas ein stadas 1977 Simona e Christina Huonder. Ellas pertgiravan vaccas e vadials per ina paga da 1000 francs. Ei ha dau onns che negins tiers pasculavan las pastiras da casa. 1991 e 1992 han in per vaccas pasculau l'entira stad vi Plaunmieze, denton senza negin pastur.

Il pinder ni pindrer

Mirar e ver quittau ch'ei existi in pindrer era ina ulteriura obligaziun dil tgauvitg. Gia el 15avel tschentaner dat ei in document da pendradira denter ils vischins da val d'Ursera ed ils da Tujetsch. Sil cuolm d'Ursera, oz Alp Su, haveva ei stoviu ver dau ina ualti ruha dispetta. Alla fin ei denton vegniu concludiu che per mintga piculeza duessien ins buca pindrar e tgisar.

Egl uorden dals vischins da Rueras han ins fixau igl onn 1869 la successiun per ina roscha onns anavon. La funcziun dil pindrer fuva da pigliar si ils animals che mavan per ils praus entuorn, metter quels a ferm e schar saver il possesur. Cheu astgavan ins la buca clauder ils ecls ne perstgirar enzatgi, gnanc parents numdir amitgs ni autra glieud da conduita. Per temps stueva il vischin visau pagar ina pintga multa, mo il pli savens serava il pindrer giu in egl. Visar il vischin muentava beinduras agressiuns. Perquei fuva il far pinder in uffezi ch'ils biars fagevan pli nuidis che far gerau ni schizun mistral. A Rueras havevan ins per ordinari dus pindrers da pors, quels havevan l'obligaziun da mirar che tals segien enferrai, pervia il sfuir sin praus e pastiras. Stuevan quels vegnir enferrai dal ufficial stuevan ins pagar denter 50 raps ed in franc e tschunconta.

Il pindrer general dil vitg astgava trer en da sogn martin da mintga possesur da tiers in paun, numnaus il "paun dil pinder" Famiglias che vevan pulit da viver surschavan quei rimnar ne ira per il paun per ordinari ad ina famiglia cun roscha affons ni ad in ni dus dels pli paupers. Il trer en quei paun mava beinduras buca senza reproschas e beffas. Per exemplu: "Oz sei gl'emprem di che nus savein tgi ch'ei pindrer." Ord da quels motivs mavan negin propri bugen per quella paga, era ei plitost ina paga d'aviras. Sco jeu haiel intervegniu han ins giu empau dapertut quei uffeci. Oz ei era quel svanius e sparius.

Era la vischnaunca da Tujetsch pindrava pli baul animals che mavan giu gl'uaul Surrein. Ils possesurs vegnevan clamai e survegnevan in detg exordi. Gl'endisdis tscheiver haveva "igl oberkeit" lu dertgira cun tals. Igl ein bein quasi da rir cu ins legia els cudischs forestals vegls co ils possesurs vegnevan castigia cun 10, 20 ni 30 raps per tier. Denton

uorden stuev'ei esser ed els fuvan era carstgauns sco nus, buca menders e buca megliers.

La guardia da fiug

Aunc d'in auter uffeci less jeu scriver in per lingias. Igl ei la guardia da fiug. Quella haveva gl'entir onn da controllar che mintga casada hagi duas sadialas plein aua en cuschina. Lu negina lenna ne material che havess saviu pegliar fiug avon buca pegna. Mintga meins vegnevan dus auters vischins vidlunder el turnus da far quella controlla e quei vegneva scret en in cudisch. Savens mavan plitost ils menders a far quella controlla. Quels fagevan magari enqual catavegna, cunzun nua ch'ei fuvaenzacontas mattauns. Quei era beinduras la raschun da carplinas, mo mintgaton er la caschun zuppadas amizezias e futuras letgs. Mintga caussa ha sias duas varts. Il cudisch dal turnus ei ius a piarder a buca pli d'anflar.

La guardia da fiug ed uorden da guardia

Ulteriuramein dev'ei la guardia da fiug per dumengias e firaus. Duas familias survegnevan l'ordra da far guardia duront che tut la glieud era en baselgia. Forsa ei quei uffeci naschius dapi che Camischolas ei barschaus giu igl onn 1822, il di da sogn Placi, duront che negin era dentuorn. A Rueras survegnevan tals che havean igl uffeci in halumbart da lenn ed il cudisch per scriver en il num. Sur da quei uffeci ha pader Baseli Berther da Dieni scret in bi artechel cun il tetel "A sogn Giachen". Mo deplorablamein ha quei uffeci era stoviu sutacumber al temps dad oz, forsa pervia che buca tut va en Baselia, forsa perquei ch'ins tema buca pli il fiug, aschia eis ei seresultau che sin radunanza da vischins dils 14 d'avrel 1991 ei quei usit e uffeci vegnius schligiaus si. Il cudisch vegl era dapi onns ius a piarder ed il davos carnet ei vegnius inscrits navenda 1990 mo cun grondas interupziuns. Ils vischins han buca viu pli il senn ed aschia eis ei iu sco ei ha pudiu. Il pal ei aunc dentuorn e duei vegnir surdaus a quel che ha igl uffeci da tgauvitg sco bitgetta dasiu uffeci.

Ulterius usits

"La curtauna dumiec"

In auter usit che s'udeva plitost tier il duer digl ugau baselgia fuva **bil** dar al caluster la curtauna dumiec. Forsa ei quei vegniu si per **sunter** l'emprema uiara mundiala, pertgei suenter mias informaziuns survegneva il caluster quella curtauna per trer si l'ura baselgia. **Cun** il niev temps e la mechanicaziun dil tuchiez e far ira l'ura baselgia ei **pia** era quei duer curdaus navenda.

Il paun per tuccar da miert

Alla fin da quei scriver e fixar usits a nus enconuschents vegnan ils davos dis della veta terrestre neuavon e la fin daquella lavur ei il **tuccar** da miert. Cu in persuna mureva annunziavan ins quei cun il zenn **grond**. A Sedrun sco a Rueras vegneva ei per in um treis gadas tuccau **per** ina femna duas gadas diesch minutus Per tuccar da miert obteneva il clauster in paun sco paga: "il paun per tuccar da mort". Oz il di **ei** quei buca pli il cass. Bein vegn ei tuccan era aunc oz per ils morts ed era aunc adina, il zenn grond, perfin ils treis cuors per ils umens e dus **per** las femnas ein restai era sch'il temps da equalitat per umens e **femnas** ei cheu, mo il paun per tuccar, lez ei ius en emblidonza.

Aschia svaneschan nos vegls usits e nus cun els, baul jeu, baul ti.

4.9.92

Francesc Berther